

U skladu sa članom 13. i 62. Zakona o lokalnoj samoupravi ("Službene novine TPK", br. 6/98 i "Sl. novine TK-a", br. 13/99 i 7/02), Kodeksa dobre lokalne uprave ("Sl. glasnik općine Srebrenik", br. 7/02) i člana 33. Statuta općine Srebrenik ("Sl. glasnik općine Srebrenik", broj. 11/02), Općinsko vijeće općine Srebrenik na sjednici održanoj dana 30.12.2004. godine, donosi:

## O D L U K U

o javnim raspravama u općini Srebrenik

### Član 1.

Ovom odlukom reguliše se javna rasprava, kao instrument učešća građana u odlučivanju i pitanja iz općinske nadležnosti za koju je neophodno organizovati javnu raspravu.

### Član 2.

Javna rasprava u općini Srebrenik **obavezno** će se organizovati u slijedećim slučajevima:

- Neposredno po izradi prednacrtu budžeta općine za narednu godinu o prednacrtu budžeta općine za narednu godinu, po usvajanju nacrtu budžeta općine za narednu godinu o nacrtu budžeta za narednu godinu;
- Neposredno po usvajanju nacrtu programa rada općinskog načelnika za narednu godinu o nacrtu programa rada općinskog načelnika za narednu godinu;
- Prilikom izrade novog ili promjene postojećeg urbanističkog plana grada, djela grada ili naseljenog mjesta o urbanističkom planu i njegovim željenim promjenama;
- Prilikom planiranja i projektovanja kapitalnih investicija u općini Srebrenik o planiranim investicijama;
- Prije potpisivanja kapitalnih ugovora općine Srebrenik sa trećim licima koji će rezultirati velikim zaduženjima ili značajnim projektima na području općine o ugovoru koji treba potpisati;
- Pri donošenju odluka koje se direktno odnose na jednu kategoriju ili grupu građana (mladi, penzioneri, poljoprivrednici,...) i imaju uticaj na promjene njihovih životnih uslova o odlukama koje će se donijeti;
- Prilikom promjene visine poreskih stopa ili taksu koje pripadaju i reguliše ih općina a naplaćuje od građana o visini poreskih stopa ili iznosu taksu;
- Prilikom promjene naziva naseljenih mjesta i ulica u općini Srebrenik;
- U ostalim slučajevima za koje općinska tijela ocijene da bi bila korisna.

### Član 3.

Javnu raspravu organizuje Služba za opću upravu i zajedničke poslove u saradnji sa službom nadležnom za oblast koja je tema diskusije na javnoj raspravi i vijećima mjesnih zajednica ili predstavnicima određenih kategorija građana.

Za sprovođenje javne rasprave organizatori će koristiti zborove građana, medije (otvorene emisije), skupštine udruženja, okrugle stolove, fokus grupe i ostale oblike okupljanja i komuniciranja koje ocijene potrebnim i primjerenim za datu temu.

#### **Član 4.**

Javna rasprava se organizuje na prostoru cijele općine ako se radi o pitanju od interesa svih građana općine, odnosno na samo jednom dijelu ili među jednom kategorijom građana, ako je riječ o pitanju od interesa za građane jednog dijela općine ili jedne kategorije stanovništva.

Javnu raspravu o nacrtu budžeta za narednu godinu i nacrtu programa rada općinskog načelnika za narednu godinu, organizuju se u svim mjesnim zajednicama općine Srebrenik.

#### **Član 5.**

Javna rasprava traje najmanje 30 dana, od dana pozivanja građana da se uključe u javnu raspravu.

#### **Član 6.**

Pravo učešća na javnoj raspravi imaju svi građani sa pravom glasa, odnosno svi predstavnici populacije na koju se odnose pitanja o kojim se vodi javna rasprava. Organizator treba obezbjediti da među učesnicima javne rasprave budu zastupljeni predstavnici svih kategorija stanovništva (penzioneri, mladi, žene,...) ili da vodi računa o polu, nacionalnoj i starosnoj strukturi ako se raspravlja o temi koja se tiče samo jedne kategorije stanovništva.

#### **Član 7.**

Javna rasprava se organizuje u vrijeme i na mjestu koje odgovara većini potencijalnih učesnika u javnoj raspravi. Obaveza je organizatora da preduzme sve potrebne aktivnosti koje će obezbijediti prisustvo i učešće građana u javnoj raspravi (obavijestiti građane na vrijeme plakatiranjem, najavom u lokalnim medijima, slanjem pozivnica,...).

Javna rasprava o nacrtu budžeta za narednu godinu, nacrtu programa rada općinskog načelnika za narednu godinu i ostalim temama koje se organizuju u svim mjesnim zajednicama, održat će se putem zborova građana, a učesnici su predstavnici općinske vlasti, članovi vijeća mjesne zajednice i građani.

#### **Član 8.**

Zaključci sa javnih rasprava moraju biti sumirani, uvaženi kod odlučivanja o predmetu i javno predstavljeni građanstvu.

Zaključci sa javnih rasprava o nacrtu budžeta za narednu godinu i nacrtu programa rada općinskog načelnika za narednu godinu dostavljaju se Službi za budžet, poduzetništvo i nadzor, odnosno načelniku općine, te će biti korišteni u izradi prijedloga ovih dokumenata.

O javnim raspravama i prihvaćenim zaključcima organizator će sačiniti izvještaj i prezentovati ga Općinskom vijeću.

## **Član 9.**

Ova odluka stupa na snagu danom objavljivanja u Službenom glasniku općine Srebrenik.

**Bosna i Hercegovina**  
**Federacija Bosne i Hercegovine**  
**Tuzlanski kanton**  
**Općina Srebrenik**  
**Općinsko vijeće**

**Predsjedavajući Općinskog vijeća**

Zukić dr. Ibrahim, s.r.

Broj: 01-380/04

Datum: 30.12.2004. godine